

張文襄公奏議

張文襄公全集卷四十八

奏議四十八

恭報折回本任日期摺

光緒二十四年四月十六日

竊臣前准總理各國事務衙門來電奉旨張之洞著卽來京陛見有面詢事件湖廣總督著譚繼洵暫行兼署欽此臣當卽欽遵交卸督篆由鄂起程恭摺奏明在案嗣於閏三月二十五日在上海行次欽奉閏三月二十四日電旨現在湖北有沙市焚燒洋房之案恐湘鄂匪徒勾結滋事長江一帶呼吸相連上游情形最爲喫重著張之洞卽日折回本任俟辦理此案完竣地方一律

安靜再行來京等因欽此臣因上海各國領事約期陸續接晤並與日本領事及督辦鐵路大臣盛宣懷有籌商事件於四月初一日自滬開行旋於初八日抵鄂四月十二日准兼署督臣譚繼洵將湖廣總督關防並王命旗牌文卷等件委員賁送前來臣當卽恭設香案望闕叩頭謝恩祇領任事伏查沙市一案兼署督臣譚繼洵已飭獲犯嚴辦疊經電奏現正籌議賠款租界等事惟武漢謠言甚多人心不靖洋人不免驚惶正在力籌鎮撫其地方一切事宜當隨時與湖北湖南兩撫臣照常悉心商辦俟地方一律安靜再行請旨

硃批知道了欽此

妥議科舉新章摺

光緒二十四年
五月十六日

竊臣前准部咨光緒二十四年正月初六日欽奉上諭
開經濟特科令中外大臣薦舉考試近日恭讀邸鈔四
月二十三日欽奉上諭殷殷以變法自強京外設立學
堂爲急又讀邸鈔五月初五日欽奉上諭於下科爲始
鄉會歲科各試向用四書文字者一律改試策論一切
詳細章程該部卽妥議具奏等因欽此際此時局艱危
人才匱乏屢頒明詔破除成格力懲謏陋空疏之習思
得體用兼備通達時務之士而任之海內士民見我

皇上處事之明決如此求才之急切如此孰不欽仰感奮竊惟救時必自求人才始求才必自變科舉始四書五經道大義精炳如日月講明五倫範圍萬世聖教之所以爲聖中華之所以爲中實在於此歷代帝王經天緯地之大政宅中馭外之道略莫不由之國家之以四書文五經文取士大中至正無可議者也乃流失相沿主司不善奉行士林習爲庸陋不能佐國家經時濟變之用於是八股文字遂爲人所詬病今聖主斷然罷去八股不用固已足振動天下之耳目激發天下之才智特是科舉一事天下學術所繫卽爲國家治本所關若

一切考試節目未能詳酌妥善則恐未必能遽收實效而流弊亦不可不防嘗考北宋初創爲經義取士之法體裁只如講義文筆亦尙近雅明成化時始定爲八股之式行之已五百年文徇俗而愈卑流積久而愈敝雖設有二場經文三場策問而主司簡率自便惟重頭場時文二三場字句無疵卽已中式遂有三場實止一場之弊今改用策論誠足以破拘攣陳腐之習矣然文章之體不正命題之例不嚴則國家垂教之旨不顯取士之格不一多士之趣向不定今廢時文者惡八股之纖巧苛瑣浮濫不能開發聖賢之義理也非廢四書五經

也若不爲定式恐策論發題或雜采羣經字句或兼采經史他書界限過寬則爲文者必至漫無遵守徒騁詞華行之日久必至不讀四書五經原文背道忘本此則聖教興廢中華安危之關非細故也竊以爲今日當詳議者約有數端一曰正名正其名曰四書義五經義以示復古文格大略如講義經論經說二曰定題四書義出四書原文五經義出五經原文或全章或數章或全節或數節或一句或數句均可不得刪改增減一字亦不得用其意而改其詞三曰正體以樸實說理明白曉暢爲貴不得塗澤浮豔作駢儷體亦不得鉤章棘句作

怪澀體四曰徵實准其引徵史事博考羣書但非違悖
經旨之言皆可引用凡時文向來無謂禁忌悉予蠲除
五曰閑邪若周秦諸子之謬論釋老二氏之妄談異域
之方言報館之瑣語凡一切離經叛道之言嚴加屏黜
不准闌入則八股之格式雖變而衡文之宗旨仍與清
真雅正之聖訓相符顧猶有慮者文士之能講實學治
古文者不多改章之始恐僅能稍變八股面目不免以
時文陳言濫調敷衍成篇若主司仍以頭場爲重則二
三場雖有博通之士仍然見遺與變法之本意尙未相
符若主司厭其空疏陳腐趨重二三場則首場又同虛

設其詭誕浮薄務趨風氣者或又將邪詖之說解釋四書五經附會聖道必致離經畔道心術不端之士雜然並進四書五經本義全失聖道既微世運愈否其始則爲惑世誣民之談其終必有犯上作亂之事其流弊尤多爲禍尤烈且明旨開特科立學堂而學堂肄業有成之士未嘗示以進身之階經濟雖併入鄉會場而未議及六科如何分考之法若非合科舉經濟學堂爲一事則以科目升者偏重於詞章仍無以救迂陋無用之弊以他途進者自外於聖道適足以爲邪說暴行之階今宜籌一體用一貫之法求才不厭其多門而學術仍歸

於一是方爲中正而無弊昔朱子當南宋國勢微弱之際憤神州之多難傷救世之無才屢欲改變科舉嘗考語類中力詆時文之弊者不一而足而究其救科舉積弊之法則曰更須兼他科目取人歐陽修知諫院時惡當時舉人鄙惡剽盜全不曉事之弊嘗疏請改爲三場分試隨場而去之法每場皆有去留頭場策合格者試二場二場論合格者試三場其大要曰鄙惡乖誕以漸先去少而易考不至勞昏全不曉事之人無由而進其說頗切於今日之情事朱子之擬兼他科目猶今之特科經濟六門也歐陽修之欲以策論救詩賦猶今之欲

以中西經濟救時文也又查今日定例武科鄉會小試騎射步射硬弓刀石分爲三場皆有去取人數遞刪而遞少技藝遞考而遞精而磨勘之例尤以末場弓力爲重竊謂宜遵師朱歐之論近仿武科之制擬爲先博後約隨場去取之法將三場先後之序互易之而又層遞取之大率如府縣考覆試之法第一場試以中國史事國朝政治論五道此爲中學經濟假如一省中額八十名者頭場取八百名額四十名者頭場取四百名大率十倍中額卽先發榜一次不取者罷歸取者始准試第二場二場試以時務策五道專問五洲各國之政專門

之藝政如各國地理學校財賦兵制商務刑律等類藝
如格致製造聲光化電等類分門發題考試此爲西學
經濟其雖解西法而支離狂悖顯背聖教者斥不取中
額八十名者二場取二百四十名額四十名者取一百
二十名大率三倍中額再發榜一次不取者罷歸取者
始准試第三場三場試四書義兩篇五經義一篇取其
學通而不雜理純而不腐者合校三場均優者始中式
發榜如額磨勘之日於三場尤須從嚴如有四書義五
經義理解謬妄離經畔道者士子考官均行黜革如是
則取入二場者必其博涉古今明習內政者也然恐其

明於治內而闇於治外於是更以西政西藝考之其取
入三場者必其通達時務研求新學者也然又恐其學
雖博才雖通而理解未純趨向未正於是更以四書義
五經義考之其三場可觀而中式者必其宗法聖賢見
理純正者也大抵首場先取博學二場於博學中求通
才三場於通才中求純正先博後約先粗後精既無迂
闊庸陋之才亦無偏駁狂妄之弊三場各有取義以前
兩場中西經濟補益之而以終場四書義五經義範圍
之較之或偏重首場或偏重二三場所得多矣且分場
發榜則下第者先歸二三場卷數愈少校閱亦易寒士

無候榜久羈之苦謄錄無卷多謬誤之弊主司無竭蹶
草率之虞一舉三善人才必多而著重尤在末場猶之
府縣試皆憑末覆以定去取不愈見四書五經之尊哉
其學政歲科兩考生童均可以例推之歲科考例先試
經古一場卽專以史論時務策兩門發題生員歲考正
場原係一四書文一經文卽改爲四書義經義各一生
員科考童生考試一切均同其童試孝經論性理論應
仍其舊難者或曰主司罕通新學將如之何不知應試
則難試官則易近年上海譯編中外政學藝學之書不
下數十種切實者亦尙不少闡中例准調書據書考校

似不足以審考官且房官中通曉時務者尙多總裁主
考惟司覆閱尤非難事至外省主考學政年力多強諭
旨旣下以三年之功講求時務豈不足以爲衡文量才
之資乎惟是變法之初兼習未久其研求時務者豈能
遽造深通是宜於甄錄之時稍寬其格以示駿骨招賢
之意兩科以後通才碩學自必蔚然可觀且登科入仕
者漸多則京外考官房官自不可勝用矣抑臣等之愚
更有請者百年以來試場兼重詩賦小楷京官之用小
楷者尤多士人多逾中年始成進士甫脫八股之厄又
受小楷之困以至通籍廿年之侍從年逾六旬之京堂

各種考試仍然不免其所謂小楷者亦不合古人書法
姿媚俗書貽譏算子挑剔破體察及秋毫且同一紅格
大卷而殿試散館優拔貢朝考字體之大小不同同一
白摺而朝考大考考差御史各項字格之疏密不同紛
歧煩擾各有短長詔令並無明文而朝野沿爲痼習故
大學士曾國藩奏疏嘗剴切言之夫八股猶或可以覘
理解之淺深詩賦則多文而少理詩賦猶或可以見文
詞之雅俗小楷則有藝而無文其損志氣耗目力廢學
問較之八股詩賦殆有甚焉由是士氣銷磨光陰虛擲
舉天下登科入仕之人才歸於疏陋輒熟以至今日遂

無以紓國家之急今旣罷去時文則京官考試詩賦小楷之舉亦望聖明奮然釐定一併掃除查鄉會試之外惟殿試一場典禮至重自不可廢然臨軒發策登進賢良自宜求得正誼明道如董仲舒直言極諫如劉蕡者而用之斷不宜以小楷爲去取一經殿試卽可據爲授職之等差以昭鄭重朝考似可從省及通籍以後無論翰苑部堂一應職官皆以講求實學實政爲主凡考試文藝小楷之事斷斷必宜停免惟當考其職業以爲進退則已仕之人才不致以雕蟲小技困之於老死俾得汲汲講求強國禦侮之方此則尤切於任官修政之急

務者也至於詞章書法潤色鴻業乃館閣撰述應奉文字所必需自亦不可盡廢如朝廷需用此項人員之時特頒諭旨偶一行之不爲常例略如考試南書房考試中書故事嚴則止及翰詹寬則無論翰詹部屬小京官皆可與考視其原有階品分別授官應候請旨裁定與三年會試殿試取士之通例各不相涉庶幾文學政事兩不相妨矣難者又曰本朝名臣出於科舉翰林者多矣安見時文詩賦小楷之無益不知登進貴顯限於一途固不能使賢才必出其中抑豈能使賢才必不出其中此乃偶然相值非時文詩賦小楷之果足以得人也

且諸名臣之學識閱歷率皆自通籍任事以後始能大進然則中年以前神智精力銷磨於考試者不少矣假使主文者不專以時文詩賦小楷爲去取所得名臣不更多乎竊謂如此辦法博之以經濟約之以道德學堂有登進之路科目無無用之人時務無悖道之患似此切實易行流弊亦少此舉爲造就人才之樞紐而卽爲維持人心世道之本原臣等憂慮所及不敢不効其一得之愚事體重大伏望敕下廷臣會議施行不勝惶悚激切之至

上諭張之洞陳寶箴奏請飭妥議科舉章程並酌改考

試詩賦小楷之法一摺鄉會試改試策論前據禮部詳
擬分場命題各章程已依議行茲據該督等奏稱宜合
科舉經濟學堂爲一事求才不厭多門而學術仍歸一
是擬爲先博後約隨場去取之法將三場先後之序互
易等語朕詳加披閱所奏各節剴切周詳頗中肯綮著
照所擬鄉會試仍定爲三場第一場試中國史事國朝
政治論五道第二場試時務策五道專問五洲各國之
政專門之藝第三場試四書義兩篇五經義兩篇首場
按中額十倍錄取二場三倍錄取取者始准試次場每
場發榜一次三場完畢如額取中其學政歲科兩考生

童亦以此例推之先試經古一場專以史論時務策命題正場試以四書義經義各一篇禮部卽通行各省一體遵照朝廷於科舉一事斟酌至再不厭求詳典試諸臣務當仰體此意精心衡校以期遴選真才至詞章楷法雖館閣撰擬應奉文字未可盡廢如需用此項人員自當先期特降諭旨考試偶一舉行不爲常例嗣後一切考試均以講求實學實政爲主不得憑楷法之優劣爲高下以勵碩學而黜浮華其未盡事宜仍著該部隨時妥酌具奏欽此

酌擬變通武科新章摺

光緒二十四年
五月十六日

竊准兵部咨開會奏變通武科一摺並擬定大概章程
十條光緒二十四年二月二十六日欽奉上諭著照該
大臣等所議鄉試自光緒二十六年庚子科爲始會試
自光緒二十七年辛丑科爲始童試自下屆爲始一律
改試槍礮等因欽此又准兵部咨議覆廣西巡撫黃槐
森奏武場改試洋槍並考取中式分別選用一摺令各
督撫各就見聞所及詳細奏明並開列各項章程報部
酌辦等因光緒二十四年三月二十八日具奏奉旨依
議欽此咨行到鄂仰見 皇上因時制宜詰戎奮武之
至意欽佩莫名部咨並稱令各省體察情形指陳利弊

各抒所見陸續奏咨等因竊惟今日用兵專恃火器外洋各國槍礮之製日出而益精武學教練之法日推而益密然則武科取士斷宜專習火器別定良規然後無所習非所用之弊惟是變法伊始防弊宜慎取材宜精臣查初次部咨會奏各條恐器械之不能畫一也則定指名代購之例恐藏用之漫無限制也則定報明存案之例二次部咨照廣西撫臣黃槐森原奏洋槍由士子購買槍桿刻考生姓名防微杜漸頗極周詳顧臣猶有鯁鯁過慮者軍火一項例禁綦嚴固立法之精意亦有國之恆規考之東西各國保安之槍遊獵之銃皆須繳

納稅捐頒發執照違者或科罰或沒入或監禁則視其
多少而爲之差蓋與我國舊例大略相同自髮捻削平
以來各省遂無大亂其實陬澁邊隅亂萌時有卽如近
年熱河教匪甘肅回匪亦甚披猖或兵甫集而眾降或
鋒一交而敵潰實由同治初年洋槍洋礮流入中華漸
推漸廣官軍所用無論精粗總係洋械火器精利聲威
震讐亂民無抗拒之資宵小弭藁芽之漸今若概准演
習一縣火器累百盈千收藏之家良莠不齊武生武舉
本多強梁生事之徒若又假以利器一有意外會匪游
勇糾結橫行頃刻亂作其禍豈可勝言雖云稽察責諸

地方官然州縣事繁習惰不過視爲查私鑄查燒鍋禁
宰牛禁賭博之類但以具文了之若時常挨戶搜查則
不免騷擾若但憑差役一報鄉保一結則必然有名無
實卽如民間私藏鳥槍州縣例有處分而閩粵鄉鎮槍
礮如林然則稽察之說豈可恃乎光緒十七年江南有
查獲洋人美生私買軍火接濟會匪謀奪鎮江以攻金
陵之案二十二年廣東有查獲匪徒孫文私運軍火入
城爲亂圖據廣州省城之案本年廣東又有查出匪徒
私買軍火三船之案前鑒不遠豈可更揚其波乎且近
日各國槍礮式樣日新名目繁雜同一槍礮而藥彈門

類區別甚多改造原裝等差不一若應考者每人各執一式之槍如何考校高下如須同係一式私家零購則先後參差由官代購則不勝紛擾此層似多窒礙臣詳稽舊制參考新章審酌通籌謹擬一營伍學堂武科三事合一之法查原奏章程第四條云如欲廣爲招徠則綠營制兵防營練勇不妨准其報名鄉試又二次部咨云此次改章意在合考試與操防通融定制凡武生投營營兵應試以及武舉武進士如何教練管束各大吏當參酌營制妥籌良法各等語竊謂莫如就此條之意而推之查武場條例八旗驍騎校前鋒領催等官以及

馬甲步甲分別准應武鄉試武童試綠營兵丁有願應武童試者各歸本縣與武童一體考試其取進武生准應鄉試取中武舉准應會試卽千把等官或係武生或係武舉均准分應鄉會試故各省向有兵童兵生名目是武科人才取諸旗綠各營弁兵本係國家舊制既以用其素習兼以勵其勤操立法之意至爲精切閎遠至今日於旗綠弁兵而外又有防營弁勇一項比之綠營年力人才較爲強壯操練火器較爲熟嫻今武科改試槍礮莫若卽專令營弁兵勇應試最爲無患於地方而有益於軍旅若令應武試者皆入武備學堂肄業一節

勢有所難目前風氣初開有武備學堂者共止有四五
省一省亦只一堂且武學教習甚難不能取材異地
故學堂之經費既鉅學生之額數無多大率一堂不過
數十人又必須文理清通氣習良謹者若各府各縣均
設學堂一時斷無許多之經費亦斷無許多之教習若
謂令武職教練則中華將弁向來惟尙勇敢其精細者
不過約束紀律較爲詳明其於火器理法測算繪圖工
程製造邊海形勢罕能通曉至文理通暢能讀洋書者
尤不易覲故各省大小武職能教兵勇者或間有之能
教將弁者決無其人其稍能通曉一二能教兵勇者卽

已矜貴非常則必留在防營使充營官教習豈肯令其散往各屬教授武生武童乎是學堂之廣設尤爲不易至各營兵勇究係曾經本營華洋教習教練雖不能遽語精深尙可得其粗淺且外洋定章凡入武備學堂三年者必須隨營操練一二年以增閱歷斷無學生而在營伍之外者若卽令兵勇應試名籍易考鈐束易施所用槍礮發之本營自然一律擬請惟兵勇准應武童試兵勇取進武生後仍在營充伍者准應武鄉試兵勇取中武舉後仍在營充伍者准應武會試其已拔實缺外委實缺把總候補千總者准作爲武生應武鄉試已補

實缺千總守備者准作爲武舉應武會試綠營弁兵令
該管專營之將官都司保結冊送勇營弁勇令該管之
本營管帶官保結冊送童試由各營送交原籍知府錄
送學政考試免其縣考以省紛繁而免曠誤旗營仍照
舊章鄉試仍由綠營勇營各營官冊送學政錄科會試
仍照舊章但武弁兵勇均應照例歸原籍考試不得混
考凡非在營現充武弁兵勇者均不得應武童試此後
既無營外之武童自無營外之武生既無營外之武生
自無營外之武舉武進士矣其從前取進取中之武生
武舉現未在營者准其呈請附入本省防營或學堂自

備資斧隨同學習其槍礮即用本營本堂者藥彈價值由該生呈繳並仿照外洋學堂章程令其酌繳該生火食束修雜用器具各費由該管營官及管堂之員察其年力精壯性情謹樸者方准收錄若不守規條不能勤學頑鈍難教者均隨時斥退其學堂畢業者分發本省各營酌量委用將來風氣漸開華弁可充教習者漸多各府州縣能自行籌資設立武備學堂者准其稟官辦理既設學堂則必有由官約束稽察章程雖有槍礮可無伏戎藉寇之虞迨學成以後統發各營分別効用則營伍學生合爲一貫是整飭科舉卽所以整飭營伍矣

總之非現在營伍之兵勇不准應武童試非現在營伍之武生武舉不准應武鄉試武會試卽例准應試之武弁若現不在營者亦不得錄送咨送鄉會試正與部臣前奏寓營制於科舉之意相合其利有三外洋火器價值甚昂平日練習需用藥彈爲數尤鉅若生童惜費不購則操練無具臨場考錄勉強中額仍無裨益若各省紛紛購買則合計所費不貲似乎空增一絕大漏卮亦爲非計今應試取之兵勇則操練械藥本是各營應有之需間有願附入防營學堂練習者規矩嚴肅人數必不甚多且所習槍礮卽由官借用藥彈由該生繳價是

曰塞漏其利一也我朝將才輩出大率不外乎旗營官校綠營弁兵招募練勇三項總之皆係行伍自成豐軍興以來其由武舉武進士立功著稱者實屬寥寥此輩恃符武斷如虎而冠魚肉鄉民窩庇匪盜每遇歲試鄉試武童武生聚集省城府城必滋生無數事端街市店鋪日有戒心訛詐逞兇防範隱忍待至場畢人散則彼此相慶各省官商士民無不以爲巨患萬口一辭徒以舊例相沿幾爲附骨之疽去之無術究其所長者不過粗豪斂力倖中箭枝不識字者十人而九臨敵之火器旣未嘗習制勝之韜鈴更未嘗解卽使安分守法豈能

與於干城腹心之選乎且各省武生武童舊習其騎射
硬弓刀石亦只臨場肄習數月無論中否過考輒已廢
棄於國家儲材禦侮之意毫不相涉今若專令營弁兵
勇就試卽入武學登武科以後仍有本營長官鈐束無
從爲非其技藝亦不至荒廢如慮專准兵勇應試恐武
童武生必少則又不然一省綠營勇營合計多者二萬
以外少者一萬五千以外三年之內止取武生千餘名
取武舉數十名或十人而取一或二十人而取一何慮
不敷且應試者果能人人皆有材藝何在於多如本無
材藝混場僥倖聚眾橫行多愈爲害從此可爲地方暗

減此一項違法擾害之游民此尤潛移默化之微權矣
是曰戢暴其利二也疇昔征討髮捻之時各路軍營有
以步卒水手不數年而保至提鎮者海內忠勇之士翕
然向風近年軍務收平保案少則防軍之拔擢難文法
繁則綠營之升遷滯雖有偉材壯志無所得官糧餉聊
以餬口操練視爲具文雖經按期簡閱空言獎勸收效
終微蓋兵勇自視不過如擔夫匠役食力營生其謹愿
者僅不爲會匪地痞而已人旣卑視兵勇兵勇因而自
卑若望其深明敵愾同仇之大義講求破敵致勝之方
略蓋亦難矣今若懸此一途以爲營弁兵勇進身之階

功名所在則肄習自精不待朝廷督責將帥勸勉而各省各營皆爲勁旅矣是曰勵軍其利三也抑臣尤有進者親上死長者強國之本原明恥教戰者強兵之要術當此羣強憑陵正所謂天下危注意將之會近年東西洋各國精研兵事最重武職其國君卽服提督之服鄰國之君互相贈送以將官之銜故人人以當兵爲榮以從軍爲樂以敗奔爲恥王子之尊下儕戍卒一隊之長榮若登仙凡挂名軍籍者居鄉則族黨貴之過市則路人敬之以故弁兵之自愛聲名修飭行檢過於儒士中國乃有好鐵不打釘好人不當兵之諺稍有身家戚所

鄙棄貴賤之分強弱之源也夫中國所貴者士士之徒步而致公卿者多矣人之貴之蓋有由也中國所賤者兵兵之荷戈而流爲傭丐者眾矣人之賤之固其所也卽使不終於困餓而三四十歲以外猶爲廝養之賤卒五六十歲以外始爲循資之裨將旣已純乎暮氣豈能建立奇功今欲重武厲兵而積習已深不能驟改空言訓勉亦恐無裨惟有勵行伍以科舉之一法使其非由行伍不得科舉非由科舉不得將官爵祿所在則豪傑爭趨流品旣殊則廉恥自立將領不肯侮辱旁人不敢輕量從此凡爲兵勇者儼然可列士流欣然望得大將

夫然後世族文儒皆肯入伍感慨激發人人有執干戈衛社稷之心然則今日欲求中國士氣之奮軍實之修轉移微權必在於此又臣區區之微意也綜考各國軍政有武學而無武科其各等學堂以次考拔發營錄用卽是中國武科武試從無不由學堂出身之官校亦無不充軍營官校之學生其法實將武營武學武科三事合而爲一立法最善故今日而欲采擇西法莫如先自練兵始欲學西人之練兵莫如自開兵勇之升階合學堂於營伍始矣若其學習考試之法非僅改用槍礮遂能收效厯考外洋諸國無不讀書不明算不能繪圖

之將弁亦無不識字之兵丁誠以今日戰事日精戰具日巧卽一哨弁之微亦斷非粗材下走所能勝任若只考槍礮準頭從容施放中靶者多殊難去取且憑此卽授以侍衛參遊都守之官似亦太易擬請仿馬步箭弓刀石武經三場之制頭場試槍礮準頭兼合演試裝拆運動之法二場試各式體操及馬上放槍步下擊刺之技三場試測繪工程臺壘鐵路地雷水雷輿地戰法等學鄉會試格式宜較嚴童試格式宜較寬三場合校智勇兼優將來洊膺將領庶可勝任又考外洋兵制及武學章程初入營及末弁學堂者年不得過二十歲蓋以

年力少壯則體操及測算各事始能按程學習穎悟易通以後凡應武童武科亦宜酌定年限卽武科從寬亦不得過二十五歲至所試之槍礮槍則以單響毛瑟爲主蓋此項槍彈各局多能自製礮則以單響七生半及六生車礮爲主蓋此項礮用處最多而金陵局製熟鐵六生車礮一名兩磅礮成本頗輕雖不如外洋之精操練亦頗可用他局仿造尙不甚難卽向江南購造亦不甚貴若本省自有七生半車礮者亦可通融學習考試通行似惟此兩種槍礮最爲適用而易得若快槍快礮過於精巧珍貴各路軍營尙且難得各省生童豈能皆

習此種他日製造既廣改習亦不難也方今時際艱危
宜防隱患事關變法不厭求詳臣管見所及不敢緘默
是否有當恭候聖裁其有未盡事宜自當遵照部咨陸
續開單奏咨

殊批著兵部會同總理各國事務衙門議奏欽此

保薦使才摺

并情單

光緒二十四年六月初一

竊准吏部咨稱光緒二十四年四月二十三日奉上諭
方今各國交通使才爲當務之急著各直省督撫於平
日所知品學端正通達時務不染習氣者無論官職大
小酌保數員交總理各國事務衙門考驗帶領引見以

備朝廷任使欽此竊惟專對之選異等之才自古重之
況方今強鄰環伺則使才尤亟茲者仰蒙 聖主慎重
邦交豫儲才俊破格蒐采不限階資臣謹就平日體訪
考察確有所知者敬舉數員以備朝廷采擇該員等銜
名才具另繕清單恭呈御覽該員等才性雖各有所長
要皆能考求鄰政慎固邦交不僅以賓介酬酢壇坫周
旋遂謂克盡厥職者所有微臣遵旨保薦使才各緣由
理合恭摺具奏伏祈聖鑒

謹將保薦使才各員繕具清單恭呈御覽
降調內閣學士陳寶琛

該員才品兼長學端志遠辦事沈毅有爲向來講求洋務於兵輪商務工作等事並皆熟習中外大局均屬瞭然能見其大不同侈談西學皮毛者

湖南鹽法長寶道黃遵憲

該員學富才長思慮精細任事勇往曾充日本及出使英法大臣參贊及新加坡總領事等官深悉外洋各國情形著有成書於中外約法西國政事均能透澈

直隸候補道傅雲龍

該員學問優長治事精核考求洋務曾經遊歷各國

著有成書

奏調湖北差委三品銜分省補用知府錢恂

該員中學淹通西學切實識力既臻堅卓才智尤爲
開敏歷充歐洲各國出使大臣隨員參贊於俄德英
法奧荷義瑞埃及土耳其各國俱經遊歷博訪深思
凡政治律例學校兵制工商鐵路靡不研究精詳曉
其利弊不同口耳游談洵爲今日講求洋務最爲出
色有用之才

江蘇候補同知鄭孝胥

該員才識堅定學問湛深辦事沈摯有力前充出使

日本大臣隨員於東西洋形勢政術均能得其要領確有見地

審結沙市客民滋事一案摺

光緒二十四年六月二十四日

竊照本年閏三月十九日沙市地方因湖南幫客民與招商局更夫滋事焚毀關局囤船延燒華洋房屋一案經臣繼洵在兼署總督任內檄調各營前往防護並委員會同地方官查辦拏獲首要各犯余以仁等四名審明先行正法梟示餘犯飭再確審擬辦此案起釁詳細情形暨獲犯審辦各節業經奏報在案其時英日兩國均以沙市案情重大誤信謠傳均擬派兵輪赴沙臣之

洞奉命入覲行至上海欽奉電旨折回本任辦理此案
當經一面飭荊州道府營縣安撫居民拏辦餘犯一面
與英日兩國領事等籌議完結此案辦法茲據荊宜施
道俞鍾穎湖北候補道扎勒哈哩率同荊州府知府舒
惠江陵縣知縣劉秉彝暨各委員等稟稱沙市湖南幫
客民余以仁因同鄉楊與全被招商局更夫周順興毆
傷肇釁糾眾焚燒關局延燒華洋房屋一案先後拏獲
首要各犯均籍隸湖南巴陵湘陰臨湘等縣會提逐一
研訊均各認供不諱除情節最重之余以仁李得勝張
太貞袁輝煌四犯先已奏明正法外其餘各犯內有易

跛子卽易成應一名訊係曾經聽從放火滋鬧該犯素不安靜擾害地方應擬以永遠監禁周玉清黃善堂余忠恩許興明譚左卿五名訊係隨聲附和燒毀華洋房屋雖未搶奪財物未便稍事寬縱該五犯均應擬以監禁十五年招商局更夫周順興卽王姓訊係倚仗主勢於楊與全前赴招商局門首洩溺輒卽持擔行兇傷人以致釀成巨案情節較重應擬監禁十年曹品堂楊高明二犯究無隨同放火搶奪情事惟因楊與全被傷抬回醫治中途攔轉並投鳴同幫之楊悅來開會館門請客議事釀成事端均應擬監禁五年以上監禁各犯均

俟限滿由地方官察看是否安分守法酌量辦理劉蔭堂彭德太陳春堂湯成家劉洪臣彭方心李福元孫保廷劉懷保九犯訊係僅止隨同滋鬧拆毀柵欄並未放火搶奪均應酌予滿杖繫帶鐵桿石墩三年徐正煥陳茂清卽陳教師二犯訊係僅止隨同滋鬧並未拆毀柵欄亦無放火搶奪情事均應酌予杖一百枷號一箇月沙市招商局董捐納同知銜候選知縣張鴻澤平日恃勢凌人此案如將更夫當時交出審辦自可無事乃袒護更夫不交以致南幫之人不服滋事釀成巨案其咎甚重應與南幫約束不嚴之會首從九品職銜楊明階

一併斥革另行追照繳銷永不准投効軍營更名捐復並飭各府縣驅逐回籍不准在湖北地方逗留逸犯獲日另結等語臣等督同臬司覆加查核所擬尙屬允協應卽照此完結至沙防營勇日本公使所稱滋事時該勇爲匪黨聲援查明尙無其事惟近駐該鎮不能彈壓解散趕督水龍前往撲救實屬觀望不力已飭將該營勇丁撤遣回籍遴派得力將官另行募足所有管帶該營總兵江得意督率不力應請旨以都司降補該營右哨哨官花翎遊擊李心鑑後哨哨官把總池士祥二員應請均卽革職江陵縣知縣劉秉彝係於閏三月十七

日到任沙市滋事係本月十九日中間僅隔一日沙市
又距江陵縣城十餘里之遙該令一聞事出卽行馳往
實屬竭力保護勢有弗及查光緒二十二年總理各國
事務衙門奏定教案處分章程內載如係事起倉猝迫
不及防應將地方官照防範不嚴降一級留任公罪例
議以降一級留任等語此案江陵縣知縣劉秉彝到任
僅止二日實係事起倉猝迫不及防隨卽趕赴沙市竭
力彈壓撫慰居民幸未激成巨釁並將首要及附從各
犯拏獲多名懲辦應照章議以降一級留任管帶荆江
後營水師副將張國棟所帶皆係礮船曾經派勇協同

彈壓據該道等查明各船一時難於調集人少力難鎮懾尙非保護不力照章議處應請俟補缺之日降一級留任至延燒英日兩國公寓洋行損失貨物各節前准總署電開日本公使矢野照會沙市一案該國政府電令要求五事一明降諭旨將各外國人身家財產一體優待保護勿再有如此之事諭旨須極周詳二速將此案匪徒從重治罪並彈壓不力之地方文武從嚴議處三賠補關平銀十萬五千兩四沙市專管租界章程以杭章爲本五岳州福州三都澳均設日本專管租界嗣後又接該公使照會將賠款減爲一萬八千兩餘款又

減其半改爲修隄費各等語查沙市滋事一案費起招商局細故並非與各國洋人爲難當經臣之洞隨時酌議電達總署與日本公使矢野詳商一切其所請明降諭旨一節恭讀五月二十四日邸抄此事已經欽奉上諭又諭拏辦匪犯懲儆地方文武官均爲我內政應辦之事茲已分別擬辦至所索租界照杭章一節查杭章乃未定專管租界以前所議既定專界則斷難援照浙鄂情形迥異只能就地定章至租界細目地價可予酌減道路溝渠常租可免惟其價未便全免許其隨意酌給華民雜居一條漢口德界已經總督署允行日界自

可照辦又請開三埠各節事與沙案無涉已經辯論明
晰可置不議又索賠一萬八千兩一節查日領事住屋
乃係我租與並非彼屋原訂合同有遇火延燒日本不
賠屋中國不賠物之語本可不賠卽日本領事屋後貨
物陳列所屋宇窄狹所失當亦不多惟釁起匪徒在地
主願敦睦誼現已飭沙市關監督在原處重造新屋仍
照原式量加擴充整潔租與日本領事租價多少不計
以便安居擬共給賠款銀一萬兩一切各項賠補均包
在內又所請以八萬六千餘兩作沿江隄費兩國各半
一節事屬可行當已照允並與議明修隄工費恐尙不

止此數惟此乃兩益之事將來無論所費若干總是兩
國分認興修時公同估計公同監工以上與日本所議
各節經總署屢與辯論日本政府暨公使頗能顧全鄰
誼不肯始終堅執業由總署與矢野議定完結又英領
事所索各節除明降諭旨懲辦各犯懲處官員三條與
日本相同已經自辦外所索賠補怡和洋行存貨器具
招商局國船存貨及領事幕友人役失物共銀二萬二
千九百餘兩疊加辯駁共許給一萬兩完案惟催開岳
州口岸一節屢次照會目前即須開辦詞意堅悍查岳
州地方係奉旨開作通商口岸久經知照各國此乃我

自開之口不應牽入沙案且湖南風氣未開若舉辦太驟布置未周於商務必然無益昨准總署來電擬於明年二月開辦當卽另文照知英領事聲明此與沙案無涉又英領事請開長沙常德湘潭三處口岸尤屬節外生枝當已正言拒之謂此事未便議及惟此次沙市肇衅係由招商局董張鴻澤一人釀成厥咎甚重據司道府縣紳民公議此案賠款本應由招商局全數繳出姑予從寬官商各半分認除日本賠款一萬兩由沙市關籌給外查沙市英國商貨存放南局國船者三千三百餘兩本應該局賠償外此外英國賠款約六千數百兩

所有英國賠款共一萬兩應飭令招商局將款繳到江漢關轉給以示儆戒而昭平允其沙市關稅務司毀失衣物應由該關監督另行斟酌補給現在沙市地方靜謐關局各項房屋飭令籌款次第修復
硃批另有旨欽此

請將荊州道江陵縣移駐沙市片

光緒二十四年六月二十四日

再湖北荊州沙市鎮五方雜處民情浮囂前三年武漢客幫聚眾械鬪戕殺多命本年復有焚燬關局延燒洋房之案皆以細故釀成巨患該地方正印各官均在荊州城內遠隔十餘里事出倉猝馳往防護已屬不及自

上年沙市開關通商以後交涉事體愈形繁難地方尤爲緊要今昔情形迥然不同自應有關道及地方正印官坐鎮其間庶可隨時隨事就近經理銷患未萌且查各省關道無不卽駐該關者應請將沙市關監督荆宜施道並江陵縣知縣衙門移駐沙市地方以資鎮懾而專責成至荊州城有將軍暨知府理事同知以次各官足資撫馭該道及該縣仍可不時回至府城察看料理似此權度緩急量爲移駐實於地方有裨

硃批該衙門議奏欽此

張文襄公全集卷四十八終

新城王樹桂校

張文襄公全集卷四十九

奏議四十九

蘆漢鐵路借款摺

光緒二十四年六月二十四日

竊蘆漢幹路前因總公司籌借比國商款上年四月先在武昌簽立草約六月比公司續派德福呢愛蘭來滬續定正約均經會同奏准在案嗣以德人膠州之役中國之情勢各國之意向皆有變更比人緣此翻議頭批銀兩遂逾期不付續送條款多與前議相背臣宣懷堅持痛駁亦將決裂時有法國駐京公使照會總理衙門稱比款有法國銀行工廠所出資本顯欲干預當以中

國公司議借比國公司之欸理不應牽涉國勢受其挾持法使所稱爲合同所不載公司不應答覆臣宣懷卽于本年閏三月初八日函致比公司代理人俞貝德罷議並呈明總理衙門照錄來往各電送請查核旋承准總署電云已與法使議定不再扛幫比使電令領事妥商正可相機因應此次議妥當不至再有反覆等語比使電請續議至再至三臣等伏思借款造路各國所索權利莫不因國勢以爲輕重比續請各欸照去年原約加增甚多照英美草約不相上下臣宣懷與該公司逐條爭論數十次絲毫不肯減讓拖延半載無可再議若

與他國另商權利仍與此無異且恐俄法必乘其後更難收束不得已體會相機因應之指准令俞貝德代比公司再送條款其尤要者在以鐵路所生之利歸還借款本利若有不敷中國必須設法彌補斷斷堅執牢不可破平心而論中國借外國之債無論官商斷不能諉卸不還要在總公司通籌幹枝互相挹注并就鐵路推廣生利務使足敷還債而已但所定條款窒碍太多者亦萬萬不能曲徇均已逐細駁改內惟過期未還借款抵完關稅一條在我爲必不可行在彼則索之尤切力拒不允磋商至極然後刪去當與定續約二十九條內

惟兩公司設有爭執請公司人詳斷一條比公司必欲註明請賣票最多國之公使詳斷臣宣懷執定武昌合同第十四款總公司專認比公司不認別國一條力予刪駁並將比使來電鈔呈總署五月初七日承准電覆費使面稱公斷一條可改寫如有爭執由總署比使商請公正人詳斷另函聲明宜請股票最多國之公使云我曾專認比公司聞欸由法國轉借若本利有欠法國不能無詞事已無可再議應先與畫押再行會同奏咨等因遵于五月初八日在上海總公司由臣宣懷先與畫押並另給一函除鈔錄咨呈總理衙門查核外謹將

蘆漢鐵路比國借款續定合同暨另函底稿繕具清單
恭呈御覽

殊批依議欽此

請飭戶部將未發部款即行續撥片

光緒二十四年六月二十

四日

再蘆漢鐵路議准撥借部款一千萬兩上年夏間經戶
部先撥銀四百萬兩保資應用自蘆溝橋至保定吳淞
至上海漢口至灤口三段先後開工陸續撥付購料購
地勘給築路各款所有部款四百萬連南洋款三百萬
現已支用垂罄臣宣懷說帖第三條以先借官款後借

洋債最後集商股爲次序臣等上年三月密陳籌辦鐵路機宜聲明無論議借何國路債必須先用華款後用洋債庶可權自我操均蒙聖明洞察故比款合同雖更變其議而必須總公司已有股本一千三百萬一節爲準的現在比款已定總工程司俞貝德已赴漢口布置接辦按照議定條款今年祇能起辦漢口至信陽一路其北若由保定南抵黃河亟須先由總公司分段購地采石趲築土木俟其堅實明年南路軌道就緒接辦北路始無間曠相應請旨飭下戶部將未發部款卽行續撥以符原議而速程功免啟比人藉口不勝激切之至

硃批該衙門知道欽此

恭報兼管巡撫事日期摺

光緒二十四年八月初八日

竊臣恭讀電傳邸鈔本年七月十四日奉上諭督撫同城之湖北廣東雲南三省巡撫並東河總督著一併裁撤其湖北廣東雲南三省均著以總督兼管巡撫事裁缺之巡撫河督京卿等員聽候另行錄用等因欽此當經撫臣譚繼洵電奏奉旨譚繼洵電悉湖北巡撫關防著交張之洞收繳譚繼洵來京聽候簡用欽此譚繼洵現於八月初二日交卸委員將湖北巡撫關防並坐名專敕暨王命旗牌文卷等項賫送移交前來臣當卽恭

設香案望闕叩頭謝恩卽於是日兼管巡撫事伏念臣
謬領兩湖茲復兼任鄂撫政劇責專益深兢惕臣惟有
將應辦各事統籌兼綜竭力圖維不敢稍涉曠誤以仰
答聖恩於萬一所有湖北巡撫關防並敕諭一道謹卽
封存現交解餉委員賁至禮部內閣分別呈繳其餘王
命旗牌等件卽留存督署再湖廣總督關防篆文係總
督湖廣等處軍務兼理糧餉關防十四字應請敕部另
鑄關防查照原文加管湖北巡撫事六字俟鑄就咨照
容臣派員祇領回鄂再將原用總督關防繳銷

漢口試辦商務局酌擬辦法摺

光緒二十四年八月初八日

竊照承准軍機大臣字寄光緒二十四年六月初七日
奉 上諭振興商務爲目前切要之圖疊經諭令各省認
眞整頓而辦理尙無頭緒泰西各國首重商學是以商
務勃興稱雄海外中國地大物博百貨浩穰果能就地
取材講求製造自可以暗塞漏卮不致利歸外溢著劉
坤一張之洞揀派通達商務明白公正之員紳試辦商
務局事宜先就沿海沿江如上海漢口一帶查明各該
省所出物產設廠興工果使製造精良自能銷路暢旺
日起有功應如何設立商學商報商會各端暨某省所
出之物產某貨所宜之製造並著飭令切實講求務使

利源日闢不令貨棄於地以期逐漸推廣馴致富強事
屬創辦總以得人爲先該督等慎選有人卽著將擬定
辦法迅速奏聞毋稍延緩將此各諭令知之欽此仰見
朝廷通商惠工阜財利民之至意欽佩莫名查商務乃
今日要政上海爲沿海總匯漢口爲上游要衝鐵路樞
紐自應分設兩局除上海一局由兩江督臣劉坤一委
員開辦外茲於漢口設立商務局以鼓舞聯絡上游川
陝河南雲貴湘粵等處工商爲要義其商學商報商會
及講求工廠製作商貨銷路等事江楚兩局各自籌辦
遇有應行聯絡通貫或應互相協助之處隨時知照會

商辦理雖分爲兩局仍聯爲一氣應由臣兩江督臣劉
坤一商酌籌辦所有應辦之事其要有八謹條列於後
一曰啟發商報商會商學皆係啟發之事商報係采訪
沿江沿海各口岸暨鄰省本省土地所產及人工所造
各貨市價銷路並譯各洋報所載商務兼譯西書之有
關商務者分期出報商會係由本局商董邀集各省各
幫大商入局定立商會或面商或通函或登報互相討
論考校以期聯絡協助力厚氣旺商學係考求製貨理
法銷貨道路綜核新式護商律例以及中外盈絀銀幣
漲落各國嗜好各業衰旺各情形自應設立學堂延師

教習方能增長智術惟中國設立商學華人能任教習者斷無其人若延請洋教習經費太鉅且設堂經費亦屬不貲斷難舉辦惟有赴外洋學習但西洋過遠東洋較便商會中人有願往者自備貲斧或由商會籌集公款湊齊人數若干由該局稟臣發給護照前往並咨明總理衙門暨出使大臣查照至設局之始不能不酌籌經費以資刊報設會等事之需擬於整頓牙帖項下籌撥以後商務漸興果有成效方可與眾商酌議籌集經費之法二曰倡導製造土貨需用機器華商不知成本若干有無利息未敢試辦現擬除已設之紗布絲麻各

局外其餘土貨之需用機器者若牛皮骨角紙張竹器漆器洋蠟之類均可次第籌辦官籌本若干並借商欸若干先設數廠令其觀感見有成效自知仿行或代爲訪求製造之法及需用何項機器以爲之倡三曰合力商務必集公司方能大舉一省商力不足合他省以益之查上游四川雲貴等省出產土貨甚多而地勢較偏購機選匠種種不便且機器運至川江以上實屬不易銷路亦窄若造成後再運至下游行銷徒多往返耗費至於陝甘河南兩廣湖南亦不如漢口地勢適中四達現擬於武漢一帶衝要地方購買地段以備入商會者

在此地段內購地造屋或設行棧或設機廠四曰塞漏現
在洋商已准在內地設廠製造土貨無從禁阻愈開愈
多華商更難覓生計即使日後續開固已著著落後莫
若議與洋商合辦既免占我全利并可學其工藝此亦
補救漏卮之一法五曰祛習中國商賈積習識陋見小
亦思依仿新式辦運新貨而偷減工料貨質全非以假
亂真以劣撓優種種欺偽以致外人割價退盤甚至無
人過問其貨真價實之商反爲所累甚有招集股分意
存誑騙事未辦成資已用罄遂至人人畏避公司難集
商務莫興實緣於此必須明定賞罰以示勸懲六曰保

護近日各省倒帳之案層見疊出漢口沙市已屬不少
商局既設未倒之先官爲訪察防護既倒之後官爲嚴
追懲辦凡曾經倒塌之商照西例飭令報窮列諸商報
使遠近咸知以後永遠不准更名充商貿易七曰體恤
嚴禁稅關釐卡留難需索新製土貨可以抵制洋貨者
奏明減輕或暫免稅釐定明專利年限不准他商仿造
八曰獎勵新創機廠暨捐資興辦商報商會商學及在
外洋學成工藝回華可資實用者奏明請獎以上八端
總之不外於抵制洋貨依仿洋式借助洋師之義從此
著手方爲有關內地商務大端由粗入精由近及遠卽

將前經奏設之勸工勸商局歸併此局之內其中事體繁博現在先立大概章程此後隨時籌畫變通務期以漸推廣查有奏調湖北差委廣東候補道王秉恩端廉切實才力精強商務綜核尤所擅長此次另片奏調之江蘇候補道程儀洛廉正核實不辭勞怨擬委令該兩員會同總理其事並擬遴選殷實誠信通曉時勢之商董數人爲總董惟漢口之商外省人多本省人少但取其熟悉商情勢難拘於本處紳士所有選員設局大概情形已經於七月十八日電奏奉旨允准在案現在督飭該道等將商務應辦各事宜妥擬詳細章程認真次

第籌辦務期聯絡上游各省漸次擴充

上諭朕欽奉

慈禧端佑康頤昭豫莊誠壽恭欽獻崇

熙皇太后懿旨國家振興庶務凡有益於國有利於民者均應及時興辦以立富強之基前因商務爲當今要圖特諭劉坤一張之洞就沿江沿海一帶先行試辦茲據張之洞奏稱應於上海漢口設商務局以聯絡川陝河南雲貴湘粵等處工商講求工廠製作商貨銷路等事並酌擬辦法等語商務爲利源所繫創辦之始不在恢拓規模而在考求實際現在財力未裕所需經費無論官籌商借皆當以核實爲主毋稍虛糜該督所擬辦

法八條均尙扼要江漢上游爲商務大宗張之洞責無旁貸卽著督率在事各員加意講求認真經理隨時會商劉坤一與上海局聯絡一氣務期中外流通確有成效不得徒飾空言致負朝廷力圖振作至意欽此

會奏湖北釐金擬請外銷賞欵提解充饒摺

光緒二十

四年八月

竊臣等欽奉上諭現在事機日迫出入兩欵不敷甚鉅前曾諄諭各省嚴杜釐金中飽著卽嚴飭在事各員釐剔弊端力除中飽確實覆奏等因欽此嗣准戶部咨令各省將外銷各欵向來取給釐稅者據實奏明分別裁

減一面將所收釐稅數目據實報部毋事欺飾等因具奏奉旨依議欽此欽遵咨行到鄂臣等當卽轉飭司道遵辦並派員分赴各局密查茲據各委員查明稟覆由湖北布政使王之春會同總辦通省牙釐局司道覆核具詳前來臣等伏查湖北釐金自前撫臣胡林翼開辦以來迄今四十餘年原定稽徵之法本屬周密迨經各督撫臣暨臣等隨時增定尤爲加嚴凡有商人赴局完釐向用兩聯大票由總局印發各局收存隨時填給不特應完正釐於票內逐一填註卽有偷漏罰欸亦於票內註明隨正同解其票四聯一由本局支查一齎總局

覆核其餘二聯均給商人持赴經過之局覆查無訛裁
一聯仍繳總局核對總局於繳到之票派員專司稽核
稍有不符立即查究不稍寬假其各局收數各有定額
並查照上三年收數按月按年逐一比較盈則記功留
辦絀則記過撤差甚且停委罰賠倘查有弊端並即參
追上年臣之洞於兼署撫臣任內又經奏定章程由地方
官稽查按季密稟臣繼洵亦不時密委親信之員分投
訪查遇有商人控告之案輕則委查重則提究從不稍
事瞻徇層層考核立法綦嚴以故各局委員無敢欺朦
未能中飽惟湖北地方年來水旱頻仍市面蕭條商賈

懋遷未能如前兼之洋關增設子口稅盛行釐收較遜
蓋由於此至於通省收數歷按定章半年奏報一次銀
錢各數均係據實造報局用經費亦照向章八分開支
卽有不敷之處亦惟設法裁減騰挪未嘗多支分釐至
釐金向收十足錢文湖北省用歷以九百八十文爲一
千每千申出底錢二十文名爲申串向爲運解盤費員
弁兵勇犒賞並小輪船薪工煤炭洋水龍夫役工食等
項之用近年收數不旺底錢亦減尙不敷支亦經前督
撫臣奏明有案此款碍難提解惟查向章各局收數如
能溢額歷係於溢收數內酌量提款充賞以示鼓勵相

沿已久此本額外盈餘旣以激勵司巡正所以裨益正
款前人立法具有深意但此項賞需之數牽算約計每
年多寡無定就近兩年提賞每年約錢六千串內外本
難裁減提解惟現當庫款支絀之際擬卽飭將此項賞
欸自本年爲始一併提解另欸造報於餉需不無補苴
其應賞司巡者卽飭各局於局用項下別求撙節騰出
酌賞不准另立名目苛取商人總之欲除中飽惟在得
人臣等當督飭司道嚴飭局卡各員督率司巡實力稽
徵並由總局隨時派員密查嚴核比較予以功過倘有
弊端立卽撤參懲辦斷不稍事姑容以仰副 聖主剔弊

裕餉之至意至湖北鹽道所收漢口督銷局移解淮鹽
緝私經費每年約銀二萬四千餘兩歷年彙入應照公
費內報銷現已奏明劃出一半充餉又四川每年包解
萬戶沱鹽卡經費銀一萬二千兩亦經奏明提出五成
銀六千兩充餉以上二項共劃提充餉銀一萬八千兩
綜計貨釐提賞鹽釐緝費兩項併計其由外銷提解充
餉者約合銀二萬三千餘兩實已竭力羅拙此外省城
各善堂書院學堂並歲修城垣壇廟及口岸街道工程
各項經費或由地方籌捐或提罰欸充用或由關局經
費節省多寡有無難以預定均係隨時籌畫設法支持

其數難以確指以上各項經費均未動用庫款既與正釐稅無涉自應邀免開報除咨戶部外謹會同奏陳伏乞聖鑒

硃批戶部知道欽此

裁營騰餉精練洋操片

光緒二十四年九月初十日

再查今日以練兵爲第一要務而練兵非仿照洋操不可我軍操練舊法理雖具而法較疎且於礮械工程測算繪圖等事未能講求施之今日禦侮斷不可恃惟西法弁兵操練之制先練體操再練槍礮最爲勤苦其測繪工程等事學堂之功課野操之奔馳尤爲繁細勤勞

非年力强壯志氣堅卓能耐艱苦者不能充當而欲得此項志堅力强之人非厚給餉需不可且非衣履堅韌飲食充足居處爽潔則終年督課終日跋涉其人亦斷不能支故洋操經費亦必較多非此則仍然無益查湖北在省各防營操法必須一律方有實用餉章亦必須一律方能鼓舞若餉章操法參差不一終非治軍之法西人每每竊議面勸屢以爲言但各營俱練洋操均須加餉當此餉需支絀之際籌措爲難惟有減營加餉庶款不增而兵可練人數雖少較有實際現擬將緝私武勝新營五百名裁撤另派武功左營升字左營兩底營

勇丁五百名前往填紮餉銀仍在督銷局所解緝私營
勇專餉撥給騰出升字等兩底營餉銀每年共二萬四
千七百餘兩又沙防營因沙案彈壓不力裁撤另將蔣
聲耀所帶之武防左營調往填紮改爲沙防營每年騰
出武防左營餉銀一萬二千餘兩又裁撤漢口緝捕營
勇一百名每年騰出該營員弁勇丁薪糧銀七千餘兩
又裁撤大冶鐵山馬鞍山煤井所紮之武勝右營一底
營二百五十名每年騰出餉銀一萬二千餘兩其鐵山
煤井另派練軍彈壓以上計裁四營及緝捕營勇一百
名每年共騰出餉銀五萬六千餘兩查原有工程隊一

哨分爲橋梁營壘電雷修械測繪路電六所經臣親加
考驗勇丁皆精強趨捷各門功課均能通曉已著成效
擬添募四百名足成五百名爲工程隊一營專選年二
十歲以下兼能識字者方准收入遴委千總姚廣順爲
管帶此外並將副將吳元愷所統武愷二底營五百名
副將俞厚安統帶之武防中營一底營二百五十名均
令改練洋操弁勇精加選汰其精力不能習練洋操者
卽行開除應支餉需照護軍洋操各營一律加給以勸
勤練而一心志此時除分防漢口分防沙市分防襄樊
及麻羅緝私田家鎮礮臺各營未練洋操其餉費仍舊

開支外其在省城各營餉章操法均歸一律現經臣采
取外洋陸軍章程並鄂省洋操隊現行操法酌定操練
課程刊發省防各營一律按期按時操練除派員常川
稽察外臣仍當自行隨時親赴各營督察考校不特以
爲將士之課程卽自定爲臣之課程統計添募工程隊
四百名並加給武愷武防等營餉項每年共需銀六萬
六千餘兩以所裁四營及緝捕營餉銀五萬六千餘兩
及裁去武愷右營撥抵新軍兩營不足之餉一萬餘兩
外餘銀二千兩一併撥抵尙不敷銀八千餘兩容臣將
省外水陸防營及他項雜支通盤籌畫撙節補足總期

餉不另增兵有實用教練一律悉成勁旅以期仰副朝廷整軍經武之至意

硃批該部議奏欽此

漢口請設專官摺

光緒二十四年十二月初八日

竊照湖北漢陽縣屬之漢口鎮古名夏口爲九省通衢夙稱繁劇自咸豐年間創開通商口岸以來華洋雜處事益紛煩近年俄法英德日本各國展拓租界交涉之件愈形棘手且奉旨開辦蘆漢粵漢南北兩鐵路現在北路早已興工南路亦正勘路紛雜萬端將來告成漢口尤爲南北各省來往要衝市面愈盛卽交涉愈多乃

漢陽縣與漢口中隔漢水遇有要事奔馳不遑若至通濟門外往返之間已廢一日且以後鐵路由該鎮通濟門外至黃陂縣界之滯口數十里間悉成繁盛之區卽皆有華洋交涉事件必須隨時應付刻期履勘斷不能稍延時日致誤事機加以商賈輻輳訟案繁滋會匪游勇溷迹窺伺緝捕彈壓在在均關緊要該縣本係繁要地方政務不少又豈能日事奔馳於數千里之中於民事洋務均多窒礙自非有正印專官駐紮漢口不足以重交涉而資治理經臣督同藩臬兩司江漢關道迭次籌議如將漢陽縣移駐漢口則該縣爲漢陽府首邑轄

境遼濶政本殷繁以之移駐仍不免顧此失彼之虞蓋漢口之不能兼顧漢陽亦猶漢陽之不能兼顧漢口如添設一縣則事屬創始一切煩費尤不易言現在通籌熟計不如將漢口同知改爲夏口撫民同知較爲協宜且品秩視知縣爲崇於彈壓亦較得力該同知向無管理土地人民之責事權不屬今擬將漢陽縣轄襄河以北之地北至灞口西至涓口橫約一百二十餘里縱約三四十里地方撥歸該同知管轄作爲正印地方官以專責成應援照河南浙川廳陝西孝義佛坪等廳成案所有刑名案件仍歸漢陽府審轉倉庫錢糧仍歸該府

考核一切治理統屬各事宜均與所屬州縣無異遇有洋務交涉地方緊要事件隨時稟承該管之江漢關道就近督率辦理以期迅速而免貽誤似此就漢口原設之官分漢陽一縣之地可免增設湊撥之煩而事權既專治理自易其養廉役食等項添籌無多衙門監獄卽就原有房基量加擴充添置應設載在祀典各壇廟暫照各直省兩縣同城之例與漢陽縣共之容俟將漢鎮舊有廟宇分別酌改亦尙簡易該鎮禮智巡檢卽在同知衙門附近擬令兼司獄事其漢陽訓導擬移設廳治改爲教諭所有該廳應撥學額及管轄地段田糧細數

並其餘應行建置事宜應俟奏准部議覆到後再行續
籌辦理至漢鎮既駐有同知專治其漢口原設漢陽府
通判雖名有緝捕之責實鮮可辦之事似毋庸仍駐該
鎮查溯漢而上六十里漢陽縣屬之蔡甸地方市面較
盛水陸交通亦屬要地不可無職分較大之員駐紮其
間擬將該通判移駐蔡甸至漢黃德道兼綜地方洋務
安民戢匪責任甚重查各省要缺道員其銜內多加兵
備字樣營汛自都守以下可歸節制此後可否請將漢
黃德道加兵備字樣以資控馭實於彈壓地方確有裨
益如蒙聖恩俞允分別改設移置應請由部另頒夏口

撫民同知夏口廳教諭禮智巡檢兼司獄各印記並另頒分巡漢黃德兵備道關防俾資信守再漢口同知本係要缺今因洋務事繁改爲撫民同知管理庶務缺更緊要擬定爲衝繁疲難四字最要缺由外揀補漢陽縣本係衝繁疲難要缺現雖將境地分撥約計尙存原轄境地三分之二且係該府附郭地方政務仍屬繁要應刪去衝字改爲繁疲難三字要缺仍由外題調以昭詳慎

硃批該部議奏欽此

剿辦宜施會匪摺

光緒二十四年十二月二十六日

竊照湖北宜昌施南兩府與川省毗連自川匪余蠻
開教以來訛言四起該兩府哥老會匪素多一名江湖
會羣思效其所爲與各處教堂爲難廣播余蠻僞示煽
惑民心臣當分飭宜施文武嚴拏造謠匪徒認真防範
本年九月二十四二十九等日施南府屬利川縣川楚
交界地方有匪衆數百名假託余蠻旗號擾至該縣將
野茶壩李子壩等處教堂育嬰堂燒燬並焚掠教民房
屋闔縣大擾經臣電飭署施南協副將楊通純派兵會
同署知縣蔡國楨迅赴掩捕立將匪徒擊散拏獲匪黨
七名其教士女嬰人等九十餘名均經救出由該縣分

別厚撫該縣稍定詎十月十五日宜昌府屬長樂縣教民劉義敦因聽教民畢開榜唆使休妻起衅與民爭毆匪徒從中煽動遂聚眾將畢開榜殺斃焚燬教堂擾及長陽巴東等縣殺斃比國洋教士董若望一名到處焚掠教堂慘殺教民該匪等以僞主帥向策安爲首李策卿李少白次之立有僞軍師統領先鋒大將等名目李策卿本係霆軍散勇改裝道士兼以邪術惑人張貼僞示招聚匪黨山中會匪聞風嚮應長樂縣屬漁陽關另起李清臣會匪一股與爲聲援旬日之間眾至二三千人旗上大書滅洋字樣率眾四出分擾三縣並突至湖

南石門縣子良坪地方焚掠教堂教民洋教士方類思
逃至澧州經地方官保護尙未被害各該縣會黨滋蔓
日廣匪燄大熾聲言係余蠻子分股欲渡江直撲宜昌
府城一面由巴東建始東趨川境與余匪合宜昌係通
商口岸華洋震恐漢口法領事宜昌英領事屢次函照
切請保護除匪沿江上下大爲驚擾當經宜昌鎮總兵
傳廷臣稟請急速募勇五百人以鎮郡城署利川縣知
縣蔡國楨募勇一百名以防川匪荊州沙市人心亦頗
惶惶伏莽皆思蠢動臣以山深地廣若不大舉及早撲
滅擾及宜昌必致成燎原之勢當派候補知府朱滋澤

總辦宜施兩府會匪事宜派副將吳元愷帶勇兩營副將劉恩榮帶勇一營乘輪馳往並飭宜昌鎮總兵傅廷臣派委遊擊鮑佑卿守備王佐賢帶練軍一百名馳往該處分路入山攻勦先令吳元愷繞至上游巴東野三關一帶截其入川之路並飭宜昌鎮施南協各派練兵分投截擊署巴東縣知縣恩潤長陽縣知縣寶以莊均各督團扼要剿捕復因荊州喫重添派提督鄧正峰帶勇三營扼紮東路漁陽關派沙防營遊擊蔣聲耀帶勇兩哨扼紮下游宜都縣聶家河一帶遏其下竄荊州之路並電商湖南撫臣俞廉三飛飭總兵陳海鵬提督賀

長發譚會友參將徐建威等酌帶營哨自石門縣越境會勦該匪竄至長陽車綫棚地方適與鮑佑卿之軍相遇夜間潛來襲營被官軍擊退斃匪五人斃匪馬四匹奪旗六桿兵丁陣亡一名受傷十二名圍丁陣亡一名知府朱滋澤及副將吳元愷一軍入山後出示解散脅從曉以此乃會匪藉名並非義舉匪黨漸散該匪見官軍已扼上游不能入川折而東趨節節內避意欲引我軍深入險阻負隅相拒以困官軍愷軍由小塘沙河等處奮力窮追該數縣跬步皆山嶺高崖險並無徑路可尋又值山中大雪冰凍嚴寒山中米穀素缺官軍裹糧

奔馳備極艱苦該匪沿途糾集賊眾復感同竄長樂署知縣蘇貽英到任甫經數日布置未周遽聞匪至率役督團出擊詎書役團丁多係入會通匪遂將該縣劫逼擁入山寨禁制不放典史亦被關禁該縣向係殘破土寨間有零落短垣數尺與無城同該匪闖入縣城大肆劫掠因聞兵勇將至旋即退出回至該縣西北之紅溢白溢兩寨內搜集城汛鄉團槍礮堆集巨石憑險拒守該兩寨陡峻異常白溢尤爲高峻寬廣周圍三十餘里其上有寨可容千人素稱天險嘉慶初年教匪爲亂占踞累年始經官軍攻克該匪分設多卡抵死抗拒副將

吳元愷帶隊趕到該處親督弁勇緣崖攀木奮勇仰攻先後將兩寨擊破殺賊一百三十餘名我軍陣亡二名受傷六名奪獲大小旗幟數十面鐵礮四尊擡槍鳥槍數十桿餘匪潰散奔逃墜崖跌斃者甚多遂將各官救出附從各匪分別懲辦繳飄免罪被擾居民妥爲安撫朱滋澤到長樂後將該縣會黨切實清查其吏役團眾附賊劫官者訊明正法會督各營及本省鄰省附近州縣分派兵團截緝餘匪先後據各路文武稟報拏獲要匪多名內有長陽一股匪首覃培章一名已經格殺宜都一股匪首袁敦五一名漁陽關一股匪首李清臣張

么兒二名均已訊明就地懲辦其殺斃洋教習之首犯楊大經及焚燬教堂首犯呂守蛟二名先經長陽縣督團拏獲解至宜昌由該府陳其璋覆訊供認屬實均已正法其倡亂劫官之首匪僞主帥向策安現經施南府知府額勒恆額署施南協副將楊通純分派兵團兜圍擒獲審辦惟其次匪首李策卿李少白等均尙在逃嚴飭分路懸賞截拏斷不容其漏網此宜施會匪鬧教爲亂派兵勦辦之實在情形也查宜昌施南兩府爲鄂省邊隅界連川湘地勢極爲險遠官軍罕能深入游匪會黨伏莽甚多兼之各處教民以教堂爲護符平日欺害

良民怨毒甚深匪徒遂藉此以行其煽惑之計以致糾集嚮應勢極鴟張現雖攻破巢穴渠魁就擒而匪黨尙須查緝且民教相仇已非一日若不設法解釋仍恐貽患將來現已飭令朱滋澤會同宜施兩府迅提已獲之首夥各犯悉心研審從嚴懲辦一面會督各屬將教案及會匪兩事大加清查妥籌善後辦法務使地方一律平靖民教照常相安以紓宸厯除由臣查明疎防文武員弁彙案另摺奏參暨陣亡兵勇查明請卹外查此次會匪起事蔓延甚廣焚掠三縣擾及鄰省專以滅洋攻教爲名愚民紛紛附和若一經出山必致不可收拾加

以山深地苦雪大糧艱各軍深入攻勦備歷艱苦幸得一舉撲滅免致燎原於交涉事體不致別生衅端不無微勞足錄合無仰懇天恩准臣擇其深入勦匪尤爲出力者據實保獎以勵戎行

硃批准其擇尤酌保數員毋許冒濫該部知道欽此

裁撤南學會並裁併保衛局摺

光緒二十四年十二月二十六日

竊臣承准總理各國事務衙門電本年八月二十一日奉旨湖南省城新設南學會保衛局等名目迹近植黨應卽一併裁撤會中所有學約界說札記問答等書一律銷毀以絕根株著張之洞迅卽遵照辦理欽此遵卽

飭據湖南藩臬兩司將南學會保衛局卽日裁撤當經
電奏在案臣仍一面飭將學約界說札記答問等書板
片全數調查來鄂一律銷毀至保衛局之設飭兩司切
實查覆經升任湖南撫臣俞廉三前在布政使任內會
同署按察使夏獻銘詳稱前署臬司黃遵憲以原設保
甲局員紳懈弛因參酌各通商馬頭捕房條規添設大
小各分局派委員紳設立巡捕更名保衛擬定章程均
以緝捕盜賊清查戶口爲主其附於保衛局之遷善所
凡失業流氓犯有賭竊等事卽收入所內看管延致工
匠教習手藝令其改過自新藝成限滿察看保釋與他

省之自新所章程相同惟湘省民情與洋教素不相能
開辦之初人以仿照洋場辦法不免驚異浮議頗多殆
試辦數月城廂內外晝夜有人梭巡凡宵小之徒皆爲
歛迹廛市一清商民翕然安之惟與保甲名異實同實
屬多立名目且設局太多經費過鉅勸令民捐力有未
逮現擬裁歸保甲局摶節用欸核實辦理等情詳請核
辦前來臣復於湘省來鄂官紳詳加詢考據稱保衛局
係變保甲之名而行保甲之實頗有成效尙無植黨情
事等語臣查保衛局旣係辦理保甲局務其兼辦遷善
習藝教養難民亦地方應辦之事原不必另立保衛之

名且辦事期在核實亦不必仿照洋場文飾之觀以示
奇異自應仍用舊日保甲局名而力掃濫支敷衍之積
習現在迭次欽奉諭旨整頓保甲臣已嚴飭該司將所
有局章參考民情斟酌妥善酌減捐數督飭員紳認真
巡緝務期事有實效款不虛糜仰副朝廷綏靖閭閻之
至意

硃批知道了卽著嚴飭湖南保甲局認真辦理毋得有
名無實欽此

張文襄公全集卷四十九終

新城王樹桂校